


日本訪書志第五冊


小松高等商業學校			
圖書部			
總 二 五 七 八 號	八 五 冊	四 二 號	九 門 三 部



善黃帝內經太素廿三卷又零殘一卷影古鈔  
卷子改

摺本

按李濂醫史徐春甫醫統並云楊上善隋大業  
中爲太醫侍御述內經爲太素顧隋志無其書  
新舊唐志始著楊上善黃帝內經太素三十卷  
黃帝內經明堂類成十卷崇文總目郡齋讀書  
志書錄解題皆不著錄知此書宋代已佚故高  
保衡林億等不及見宋志楊上善注黃帝內經  
三卷未足據也日本藤原佐世見在書目有此



書蓋唐代所傳本文政閒醫官小島尙質聞尾  
張藩士淺井正翼就仁和寺書庫鈔得二十餘  
卷亟使書手杉本望雲就錄之以歸自後乃有  
傳鈔本此本每卷有小島尙質印楣上又據諸  
書校訂亦學古親筆蓋初影本也是書合靈樞  
素問纂爲一書故其篇目次第與二書皆不合  
而上足以證皇甫謐下足以訂王冰詢醫家鴻  
寶也但楊上善爵皇時代古書無徵據其每卷  
首題通直郎守太子文學臣楊上善奉勅撰注

按唐六典魏置太子文學自晉之後不置至後  
周建德三年置太子文學十人後廢皇朝顯慶  
中始置是隋代並無太子文學之官則上善爲  
唐顯慶以後人又按此書殘卷中丙主左手之  
陽明注云景丁屬陽明者景爲五月云云唐人  
避太祖諱丙爲景則上善爲唐人審矣醫史醫  
統之說未足據也

今本漢書地理志蜀郡湔氐道注江水過郡七  
行二千六百六十里識者知其誤趙一清得見

宋本云是過郡九行七千六百六十里說文繫傳引漢

志亦與而又雜引近代人之說以後世計里強

宋本合合漢代謂宋本亦未合今按此書第五卷手陽

明外合於江水內屬於大腸注江水出蜀岷山

郡升遷縣東南流入海過郡九行七千六百六

十里也亦與宋本漢志合是宋本是而今本非

無可疑者附記于此

又按宋高保衡林億等重廣補注黃帝內經序

云隋楊上善纂而為太素時則有全元起者始

為之訓解是醫史醫統致誤亦由高保衡等又

按南史王僧儒傳有侍郎全元起欲注素問訪

以砭石語汲古本誤全為金則全元起亦非隋人增訂

於此

余又得影鈔本十部仍裝為卷子有錦小路印

按錦小路為日本舊諸侯藏書最富在小島學

古之前是此書影鈔不自學古始

黃帝明堂一卷

卷子本

首題通直郎守太子文學臣楊上善奉敕撰注  
前有自序云是以十二經脈各爲一卷奇經八  
脈復爲一卷合爲十三卷今僅存第一卷耳按  
舊唐志有楊上善黃帝內經明堂類成十三卷  
此無類成二字然必一書也森立之訪古志云  
此書寶素堂藏余所得卽小島學古本用油素  
雙鉤字體精整想見原本猶是唐人手筆卷末  
有永仁中丹波長高題識五條亦與訪書志合

森氏稱其體手太陰一經自肺藏形象以至經行膂穴纖悉具載更有注文解膂穴名義及主治病症極爲精審實係千金外臺所不有森氏精醫術博極羣書所言當不誣原本篇幅過高不便爲摺本乃仿宋刻字體版以餉世其中訛字悉仍其舊精斯術者自能辨別至楊上善相傳爲隋人余考唐六典魏置太子文學晉廢後周復置又廢唐顯慶中始置然則上善本唐人故隋志不著錄詳見余內經太素跋文

千金翼方三十卷 校元本

日本文政己酉從元槧摹刻本其原本係多紀氏聿修堂物今未知所在此本係小鳥尙質以初印本硃校于界欄上蓋據宋本元本明王肯堂校刊本及新修本草諸書合校者自丁亥訖己亥首尾十二年始成其精核可想  
又按森立之云翼方初擬附考異二卷而未成當卽以小鳥校本爲之也



千金方一卷 日本刊本

日本天保三年摹刻蓋據舊鈔本入木書法亦  
古雅首題千金方第一 并序 下題處士孫思邈  
撰序後一卷子目及本文俱接書蓋據卷子本  
體式卷末有正和四年和氣嗣成題識以下其  
家數世均有跋語下至觀應亡子德建治正安  
建武延慶康正永正天正三年止據丹波元堅  
序稱爲遣唐使人所齎同定爲真人原本未經  
林億校定者惜只此一卷按黃氏士禮居有此

書殘本存第一至第五第十一至十五第二十  
一至三十共存二十卷其餘以明刻補之仍缺  
第二十卷據其所跋亦是真人原本未經林億  
改纂者蓋孫氏原書名千金方林億等校本名  
千金備急要方固自不同也

神農本草經五卷

日本森立之輯本

森氏爲日本醫官又精攷證此所輯本草經三  
卷考異一卷據其自序及考異引證之博決擇  
之精遠出孫願二本上唯所錄上品一百二十  
五種中品一百一十四種下品一百一十八種  
蓋不信李時珍綱目所載目錄而別據千金方  
醫心方新修本草和名本草等書以爲根源之  
古然顯與本經三百六十五種之數不合森氏  
亦不言其所以然又孫氏所輯藥對佐使之類



固為龐雜而所輯佚文十二條顧氏又多四當  
是序例中語森氏概不之采恐亦未必隱居之  
舊也

經史證類大觀本草三十一卷

元刊本

元大德壬寅刊本不附寇宗奭本草衍義避孝  
宗嫌名蓋原于宋刻為慎徽原書按此書有兩  
本一名大觀本草三十一卷艾晟所序刻于大  
觀二年者即此本也一名政和本草三十一卷  
以第三十一卷移於三十卷之前合為一政和  
卷而刪其所引十六家本草義例最謬 政和  
六年曹孝忠奉敕校刊者二本皆不附入寇氏  
衍義至元初平陽張存惠重刻政和本始增入  
衍義及藥有異名者注于目錄之下

首有木記  
稱泰和甲

子下已酉冬南至晦明軒記錢竹汀考爲元定  
宗后稱制之年其說至確提要以爲金泰和  
刻本誤余別有詳考載入至明萬曆丁丑宣城

成大獻始以成化重刻政和本依其家所藏

王大獻始以成化重刻政和本依其家所藏

宗文書院大觀本之篇題合二本爲一書卷末

有王大獻後序自記甚明並去政和本諸序跋

獨留大觀艾晟序及宗文書院木記按其名則

大觀考其書則政和無知妄作莫此爲甚又有萬曆

庚子巡按兩淮鹽課御史彭端吾據 提要所  
王本重刊並去艾晟序宗文木記

稱大德本及錢竹汀所錄皆是此種 提要見

此本亦增入衍義遂謂元代重刊又從金本錄

入而不知大德原本並無衍義也又有朝鮮國

翻刻本一依宗文本不增改一字較明人爲謹

飭焉此書集本草之大成最足依據至李時珍

本草綱目頗傷龐雜不爲典要顧大觀政和兩

本棧雜不清前人未見古本多不能分別故爲

之詳疏如此

本草衍義二十卷目錄一卷

朱刊本

首載政和六年十二月廿八日付寇宗奭劄子  
又題宣和元年 月本宅鑽板印造宣教郎知  
解州解縣丞寇約校勘目錄及第一卷之首題  
通直郎添差充收藥材所辨驗藥材寇宗奭編  
撰趙希弁讀書後志作本 廣義與其序例不  
相應當誤也自序稱重定本草及圖經有執用  
已私失於商較并考諸家之說參之事實覈其  
情理證其誤脫以爲此書蓋爲掌禹錫等補注

神農本草蘇頌等本草圖經而作也余按大觀二年唐慎微之本草已刻于漕司至政和六年曹孝忠又奉命校刊慎微之書何以寇氏一不議及余意大觀政和年歲相近漕司之本或流傳未廣至曹氏校證類而宗爽之書已成嘗以質之森立之立之云此書通編藥名次第全與唐蘇敬新修本草相符日本現存蘇敬本草十卷余已得其影鈔本寇氏蓋以證類本草分門增藥爲非是因就新修而作衍義也然則掌氏蘇氏之書與新修本草義例相同又云寇

氏辨正藥品凡四百七十二種發明良多蓋翻性味之說而立氣味之論東垣丹溪之徒多尊信之本草之學自此一變然則寇氏本非爲慎微之書而作衍義張存惠刊證類本草以寇氏書入之已失其旨有明一代遂無刊本而四庫不得著錄此當急爲流布者也

傷寒論十卷

影北宋本

傷寒一書後人多所更亂而所據者大抵以成  
無已註本爲集矢不知成氏本亦非叔和所編  
真面目蓋叔和於每證治法相同者不嫌複載  
成氏則但載其初見者以後則云見某證中以  
省煩然醫道至密古人不憚反覆叮嚀意自有  
在今省去之反開學苟簡之弊然自成氏註解  
後林億校進本遂微箸錄家亦皆以成氏本爲  
叔和原書寬矣余在日本初得其國寬文刊本

見其與成氏注解本不同而刻手草率誤字甚多厥後得其翻刻明趙清常仲景全書本而後知成氏本果非叔和原書然開篇題名下卽著明趙開美校刻沈琳全校字樣是已非宋本舊式最後於書肆得此影寫本每半葉十行行十九字首題傷寒論卷第一次行題漢張仲景述晉王叔和撰次再下行低三格辨脈法第一平脈法第二又下行低二格辨脈第一再下頂格問曰云云乃知趙氏本根源於宋刻但爲題校

刊姓名遂移其行第

清常收藏名家亦爲流俗所染

此本影寫

精緻儼然北宋舊刻唯第五一卷第六上半卷第八九十三卷摹寫稍弱紙質亦新當又是後來補寫也竊怪日本著錄家皆以趙開美本爲最古而此本尙存其國未見甄異余乃無意得之歸後屢勸人重刻竟無應者念此書爲醫家本經日本翻刻趙本其板已毀恐他日仍歸湮滅故特錄其經進官階於左以審世之存心濟世者



傷寒論序

國子監

准 尙書禮部元祐三年八月八日符元祐三年八月七日酉時准 都省送下當月六日 勅中書省勘會下項醫書冊數重大紙墨價高 民間難以買置八月一日奉

聖旨令國子監別作小字雕印內有浙路小字 本者令所屬官司校對別無差錯卽摹印雕版 並候了日廣行印造只收官紙工墨本價許民 閒請買仍送諸路出賣奉

勅如右牒到奉行前批八月七日未時付禮部 施行續准禮部符元祐三年九月二十日准 都省送下當月十七日

勅中書省尙書省送到國子監狀據書庫狀准 朝旨雕印小字傷寒論等醫書出賣契勘工錢 約支用五千餘貫未委於是何官錢支給應副 使用本監比欲依雕四子等體例於書庫賣書 錢內借支又緣所降

朝旨候雕造了令只收官紙工墨本價卽別不收息慮日後難以撥還欲乞

朝廷特賜應副上件錢數支使候指揮尙書省

勘當欲用本監見在賣書錢候將來成書出賣

每部只收息壹分餘依元降指揮奉

聖旨依國子監主者一依

勅命指揮施行

治平二年二月四日

進呈奉

聖旨鑲版施行

朝奉郎守太子右贊善大夫同校正醫書

飛騎尉賜緋魚袋臣高保衡

宣德郎守尙書都官員外郎同校正醫書

騎都尉臣孫奇

朝奉郎守尙書司封郎中充祕閣校理判

登聞檢院護軍賜緋魚袋臣林億

翰林學士朝散大夫給事中知制誥充史館

修撰宗正寺修玉牒官兼判太常寺兼

禮儀事兼判祕閣祕書省同提舉集禧  
觀公事兼提舉校正醫書所輕車都尉  
汝南郡開國侯食邑一千三百戶賜紫  
金魚袋臣范鎮

推忠協謀佐理功臣金紫光祿大夫行尙書  
吏部侍郎參知政事柱國天水郡開國  
公食邑三千戶食實封八百戶臣趙槩  
推忠協謀佐理功臣金紫光祿大夫行尙書

吏部侍郎參知政事柱國樂安郡開國  
公食邑二千八百戶食實封八百戶臣

歐陽修

推忠協謀同德佐理功臣特進行中書侍郎  
兼戶部尙書同中書門下平章事集賢  
殿大學士上柱國廬陵郡開國公食邑  
七千一百戶食實封二千二百戶臣曾  
公亮

推忠協謀同德守正佐理功臣開府儀同三

司行尙書右僕射兼門下侍郎同中書  
門下平章事昭文館大學士監修國史  
兼譯經潤文使上柱國衛國公食邑一  
萬七百戶食實封三千八百戶臣韓琦

知兗州錄事參軍監國子監書庫臣郭直  
卿

奉議郎國子監主簿雲騎尉臣孫準

朝奉郎行國子監丞上騎都尉賜緋魚袋

臣何宗元

朝奉郎守國子司業輕車都尉賜緋魚袋

臣豐稷

朝請郎守國子司業上輕車都尉賜緋魚

袋臣盛僑

朝請大夫試國子祭酒直集賢院兼徐王  
府翊善護軍臣鄭穆

中大夫守尙書右丞上輕車都尉保定縣開  
國男食邑三百戶賜紫金魚袋臣胡崇

愈

中大夫守尙書左丞上護軍太原郡開國侯  
食邑一千八百戶食實封二百戶賜紫  
金魚袋臣王存

中大夫守中書侍郎護軍彭城郡開國侯食  
邑一千一百戶食實封二百戶賜紫金  
魚袋臣劉摯

正議大夫守門下侍郎上柱國樂安郡開國  
公食邑四千戶食實封九百戶臣孫固

太中大夫守尙書右僕射兼中書侍郎上柱  
國高平郡開國侯食邑一千六百戶食  
實封五百戶臣范純仁

太中大夫守尙書左僕射兼門下侍郎上柱  
國汲郡開國公食邑二千九百戶食實  
封六百戶臣呂大防

脈經十卷

宋嘉定何氏本

王叔和脈經十卷隋志已著錄新唐志同而舊唐志僅有二卷之本此宋林億等所謂好事之家僅有存者故五代高陽生脈訣得而託之然自熙甯頒布以後脈訣仍自盛行直至元戴啟宗爲刊誤始昭然知脈訣非叔和書顧脈經雖一刊於熙甯再刊於紹聖三刊於廣西漕司四刊於濠梁何氏元泰定閒又刊於龍興儒學而傳習者終稀

據諸家敘錄可見

良以經旨淵奧非貫穿



素靈扁佗者未易領取明代畢玉袁表沈際飛  
諸本皆從泰定出而奪誤尤甚唯吳勉學醫統  
正脈所收取源于何氏至今尚有存者而四  
庫提要乃未收此書殊不可解嘉慶間阮文達  
公始得影鈔何氏本著于未收書目中惜未翻  
雕傳世金山錢氏又從袁刻錄入亦未爲善本  
坊間所行更無論矣余從日本得宋刻何氏原  
本又兼得元明以來諸本乃盡發古醫經書與  
之互相比勘凡有關經旨者悉標於簡端非唯

可據諸經證此書亦可據此書訂諸經別詳吾

宗葆初壽昌夫令存心濟世若不遑及見而亟

墨諸版嗟乎人命至重二十四脈判於豪髮俗

醫沈伏遲緩之不分妄逞臆見率爾下藥殺人

不須白刃天折付之天命而蒼生之禍極矣此

書出吾願天下之業斯術者未能洞徹此旨慎

勿漫摻刀圭光緒十有九年夏四月記于鄰蘇

園

脉經十卷

影鈔元刊本

元泰定四年龍興路醫學教謝縉翁刊本前有東陽柳賢序又有謝縉翁自序並載移文一首據縉翁後序稱以官本及廣西漕司本又得鄉人黃南牖家本合校柳賢序云其卷帙篇第一人陳氏廣西之舊故陳孔碩一序亦賴之以存今以校何大任本互有異同而不如何本之勝唯劃條提行此本又較勝之後來袁表沈際飛等皆從此本出也又有成化十年畢玉重刊此

本則訛謬尤多云此本爲日本醫學提舉多紀氏所藏卽著聿修堂各醫書之家也

柳賢序

謝縉翁序

宋校定脉經序

熙寧元年劄子

紹聖三年劄子

泰定四年劄子

以上袁表本皆載之今不錄唯此劄子後有

謝縉翁重識一段袁本不載今附於左

泰定四年六月初四日

中奉大夫江西湖東道肅政廉訪使朶列禿

書吏劉伯貞

脉經皆依宋監本及廣西校定刻布其中疑處並係元本不可輒改序中已言之矣今再取二本元刻本末及今憲司准申指揮并刻之庶讀者知其原云

廬陵謝縉翁重識

脉經十卷

明刊本

明袁表重刊脉經蓋以泰定四年本爲原而間有校改並有印行後剗改者據徐中行札知所據本中多糝糊屬袁氏校正故不免臆補之處自袁氏以前此書唯有成化中淮陽刊本及趙府居敬堂本皆流傳不多自袁氏本出此後重刊皆據其本不可謂之無功此書余得之小島朱藍墨筆校記其硃筆者嘉定何太任本藍筆者明淮陽刊本墨筆者則據素靈難經傷寒甲

乙等書可稱精詳每卷後有學古校讀年月并  
記與其友人同諸姓名蓋不啻三四覆校然叔  
和所引書今不盡見其源多載千金方小島未  
以千金校之且至六卷以後亦第以宋本互校  
未及旁引他書甚爲漏略故余復以硃筆勘之  
凡見於諸醫經者異同悉著之不嫌其煩瑣也

蕭世基脈粹一卷

永正五年鈔本

此書晁氏讀書後志著于錄言治平中姚誼序  
之書錄解題宋志皆不載此日本永正五年鈔  
本首有治平三年姚誼序與晁氏說合次有嘉  
定癸未李撰跋蓋又南渡後崇川王進甫重刻  
并附王叔和脈賦此傷書今只存脈粹一書係小  
島學古舊藏森立之訪古志亦不載據姚李二  
序知世基字處厚吉州龍泉人

世爲神農學者大要以察脈論病爲急然醫經

方書祖述浩博罕際其會非性識穎銳通貫文  
藝者曷究其蘊河南蕭君處厚世基簪紱名家  
少業儒術屢應鄉薦士大夫賢而愛之處厚嘗  
因伯父及母氏數不妄節醫家者流率多庸淺  
固留意於醫輒詣淵奧鄉曲閒有少疵癘必就  
之取愈處厚不以貧富待之如一賢不肖以此  
尤重之嘗閱內經及歷代書訣患其隱昧難曉  
撮取眾善類成一編名曰脈粹雖根本聖賢而  
指括徑捷視醫道如指掌誠書訣之喉衾也不

忍管擢其善且欲傳之於人庶札瘥者無鄙犬  
之患稚子耄翁胥格仁壽實大君子用心矣與  
夫得一要義重囊深櫝惟恐人見聞者萬萬相  
遠予承乏邑事既熟處厚之爲人復嘉其存意  
故舉其大略冠于篇治平三年五月既望大常  
博士知吉州龍泉縣事姚誼序

是書乃吉州龍泉上苑隱君子世基處厚作也

應名脈粹大常博士姚公誼出宰龍泉時序云

詳矣處厚伯氏吏部銀世京崇宣閒嘗以授大



丞相韓公忠彥韓公授董大丞汲大丞得之獻  
試輒效活人甚眾名振京師寶愛不啻珠玉一  
時業醫者俯伏其門顛求恐後中更南渡往往  
散失不全崇川王君進甫迄獲善本重加校正  
刻梓與天下共就以叔和脈賦附于卷右總之  
曰診脈要捷濟人利物之量可謂廣矣獨惜其  
未詳是書流傳之本末蕭君儀甫又能錄而遺  
之尤可嘉尙儀甫名來儀好古博雅乃處厚孫  
姪云嘉定癸未上巳日修職郎連州錄事參軍

李撰謹書

鍼灸甲乙經十二卷

序例後有正統丁巳重刊本記每半葉九行行廿四字接近世所行甲乙經唯醫統正脈刊本而脫誤宏多更有以林億等校注作正文者如第一卷心怵惕條下引楊上善之說上善隋唐閒人士安何得引之此本不載楊上善說凡林億等校語俱不載亦無林億等序知所原在未校正之前其他亦多與千金外臺所引合遠勝醫統本惜有殘缺據張金吾藏書志有明初鈔

本後有熙寧二年鏤板牒後列富弼趙抃等銜  
名又陸氏藏書志亦有正統刊本則此書善本  
尙未絕於中土敬告留心醫籍者當急爲刻之

葛仙翁肘後備急方八卷

明萬曆二年李拭刊本按李拭刊有通鑑紀事  
本末亦好事者但此書既經中統楊用道附廣  
已非隱居之舊至元丙子又刊於烏氏至拭爲  
之再刻又非皇統本之舊森立之訪古志云據  
朝鮮醫方類聚所引亦是用道附廣本而今本  
所無者十四門醫心方所引亦時多差互然則  
此爲烏氏所刪與抑李拭所刪歟今皇統本不  
可見至元本亦不聞有藏者甚可惜也

又此書有萬曆三年胡孟晉重刊本日本延享  
丙寅浪華沼晉文據以翻刻以外臺千金證類  
本草所引校刊于界欄上頗爲不苟唯沼晉不  
見醫方類聚及醫心方猶未爲盡善也小島春  
沂有補輯本攷訂極精

程永培六體齋所刊直  
據萬曆本無甚異同

諸病源候論五十卷目錄一卷

影南宋本

影南宋本巢氏諸病源候論五十卷首題諸病

源候論卷一不冠以巢氏二字次題大業六年

太醫博士巢元方等奉勅撰次題風諸病原本

舊爲懷山閣所藏缺第四十四一四十二四

十三凡四卷以酌源堂所藏宋殘本補摹之首

有金澤文庫印日本古時官庫藏書之所也此

本爲小島學古從宋本影摹者按隋書經籍志

有諸病源候論五卷目一卷吳景賢撰舊唐志

則作五十卷吳景撰皆不言巢氏書新舊唐志  
則二書並載 提要疑當時本屬官書元方與  
景一爲監修一爲編撰故或題景名或題元方  
名實止一書隋志吳景作吳景賢或監之誤  
其作五卷亦當脫一十字如止五卷不應目錄  
有一卷按 提要所云隋志五卷五下脫十字  
至確又稱吳與巢同撰此書今以宋本照之題  
爲元方等撰與晁公武讀書志所稱合足見此  
書非元方一人之力准吳景賢之名已見隋書

麥鐵杖傳 提要疑賢爲監之誤未免失之此  
書有明方鑛汪濟川吳勉學等刊本近亦不多  
見通行者嘉慶閒胡益謙刊本以此本校之胡  
本之悞不下數千字且有十數條脫漏者卽如  
篇首標題增巢氏二字論上加總字次刪大業  
六年等奉勅上字每類諸病改爲病諸下又增  
候字其爲庸妄已可概見余謂王燾外臺祕要  
王懷隱太平聖惠方每部皆取元方之論冠其  
首宋制醫以巢氏論與千金翼目爲小經知此

書爲證治之津梁自素問傷寒以下未堪比數  
顧邇來操岐黃者多未寓目卽胡益謙本亦視  
同祕笈可慨也夫光緒壬午春三月記

近日崇文書局刻此書不言從何本出柯慎菴  
云是據袁壽階舊鈔傳錄差勝胡本以視此宋  
本則天淵矣甲申六月記

光緒辛卯池州周氏又刊此書自稱以舊本付  
梓實卽胡益謙本也丁酉六月記

又歸安陸氏得元刊本較勝胡周諸本然據其  
所校出刊入羣書校補中者僅寥寥數翻亦遠  
不及此本之善也丁酉八月記



諸病源候論五十卷目錄一卷 小島學古校本

日本醫官小島學古據宋本元本日本國刊本

聿修堂鈔本又以外臺祕要醫心方 日本人所撰 所

引合校於胡益謙刊本上凡訂正不下數千事

最為精審似無遺恨顧余嘗校三因一極方宋

本有云巢氏病源其列一千八百餘件蓋為示

病名也今各本唯有一千七百三十六論又校

元張從正儒門事親足本引婦人雜病帶下候

曰巢氏內篇四十四卷云云是此書並有內外

篇之目今各本此條皆在三十七卷中頗疑此  
書有殘缺因取外臺祕要重校之引有傷寒十  
日至十二日候各本皆無之又傷寒毒攻眼候  
其文大異又有重下候各本亦無更取太平聖  
惠方校之引有食癩候醫心方引有小兒鬼疳  
頭候皆各本所無然則今本果非巢氏之舊意  
其脫佚當在宋綬校刊以前顧不解陳言張從  
正所言何以有異同抑天聖刊本至南宋已有  
脫佚書賈重刊妄移卷第仍標足本得知者如  
瘦癩門有多忘候嗜眠候射眠候體臭候狐臭  
候漏掖候並與瘦癩不相涉當是別篇錯文爲  
書賈所亂不然宋綬奉勅校定此書不應疏忽  
至此惜乎學古尙未疑及此也

千金寶要八卷 明刊本

明嘉靖丁酉刊本首郭思自序次武定侯郭勛  
序次陸深序每半葉十行行二十字卷首第二  
行題前徽猷閣直學士通奉大夫致仕河陽郭  
思纂第三行題陝西西安府華州知州古孟劉  
整補校重鐫石第四行題救急方第五行婦人  
第一按郭氏原刻世久失傳其重鐫者爲華州  
知州劉整所編 正統八年刊石 厥後楊勝賢刊木于華  
州景泰六年郭勛刻木于粵東張翰刻木于蜀

中此卽蜀中本也又有隆慶六年秦王守中刊石耀州者又併爲六卷嘉慶十二年孫淵如刻于平津館叢書中者卽隆慶本也此本有小島學古硃校文字頗多訛謬不及隆慶本之佳然其次序似當仍郭氏之舊隆慶本則多所移易又脫郭氏原序又刪其救急次第原目惜乎淵如刊此書時不及見此本也

千金寶要序

序曰孫真人千金方一部三十卷二百一十八

門門中各有論下各有方論以論說人所以得病之由君子小人皆宜熟知方以治人之已病而人有未嘗得見此集者并藥有物多而難合者貧下細民因此不獲治療枉壞軀命者可勝言哉況一州一縣幾家能有千金方而有者亦難於日日示人因此孫君之仁術仁心格而不行處有之鬱而不廣處有之孫君此書上本黃帝岐伯次祖扁鵲華陀張仲景陳延之衛汜王叔和小品肘後龍宮海上而下及當時之名公

方論藥術并自撰經試者世皆知此書爲醫經之寶余亦概嘗閱諸家方書內唯千金一集號爲完書有源有證有說有方有古有今有取有舍關百聖而不慚貫萬精而不惑以儒書擬之其醫師之集大成者與唐之盧照隣謂思邈高談正一則古之蒙莊深入不二則今之摩詰斯言得其深致矣思久欲闡揚此書以廣之海內而在公牽迫終不克遂今休閒矣遂取千金方中諸論逐件條而出之以告人使人知防之於

未然之前又將千金方中諸單方逐件列而出

之以示人使人知治之於已病之後其思家與

知識家經用神驗者之附之其中

按今檢本郭氏附方不復

識別當是劉氏重鑄時混合爲一今于各別稱

金方宋槧復見學者當就其書識出之說買巨石刊之以廣其傳以救急者爲先以稍

可待者爲次以尋常大病爲三以尋常次病爲

四孫君之書以婦人小兒爲首以男子婦人雜

病爲後思今皆依之而特取諸病目前交急者

爲首此思急於救人推行孫君之妙法本意也

謹敢以千金寶要命篇誓施萬本長者仁人當  
共濟斯善宣和六年四月初一日徽猷閣直學  
士通奉大夫致仕河陽郭思謹序

武定侯郭勛序 正德十一年

上海陸源序 嘉靖丁酉

四明張楷跋 正統甲子

西野張翰跋 嘉靖十六年

外臺祕要方四十卷目錄一卷 影北宋本

原本藏日本紀藩竹田氏森立之訪古志曰此  
本嘉永己酉官下命郵致使於醫學影鈔凡二  
通一納楓山官庫一藏醫學蓋宋槧醫籍存于  
日本者頗多然多南渡以後物其北宋本如千  
金方猶有補刻特此本真爲林億等經進之原  
刊而首尾完具豪無缺失豈可不謂天下之至  
寶乎立之又言當新寫此書時立之方爲醫學  
校官以五人分書之越三年乃成其費不貲余